



## PORTAVÓS VI GOVERN U KONSTITUSIONÁL



## KOMUNIKADU BA MEDIA

Díli, Loron 5 fulan-outubru tinan 2015

### **Primeiru-Ministru ba Kuba hafoin vizita ba EUA atu tuir Assembleia Jerál Nasoins Unidas nian**

Iha loron 1 fulan-outubru, loron ikus husi ninia vizita ofisiál ba Nova lorke, Primeiru-Ministru, Rui Maria de Araújo, halo diskursu iha Assembleia Jerál Nasoins Unidas nian ba dala 70. Iha lider mundiál sira nia oin, Xefe Governu Timor-Leste nian rekoñese knaar Nasoins Unidas nian iha tinan hitunulu ikus ne'e no husu atu halo reforma ida ba organizasaun ne'e atubele "hatán ba dezafiu foun sira ne'ebé mosu husi sirkunstánsia foun sira sékulu ida-ne'e nian" ho forma ne'ebé di'ak liu. Nia fó hanesan ezemplu Konsellu Seguransa nian ida ne'ebé mak "representativu no ekilibradu" liután.

Rui Maria de Araújo ko'alia kona-ba alterasaun klimátika sira, hanesan kestaun ida ne'ebé ezije atu hola desizaun, no fó hanoin kona-ba impaktu ne'ebé mak Estadu viziñu sira iha Pasífiku sente. Primeiru-Ministru fó énfaze mós kona-ba envolvimentu Timor-Leste nian iha palku polítika internasionál, hodi hateten katak Nasaun "ne'e prontu ona, ho nia esperiénsia nasional, atu hala'o serbisu no kontribui ba comunidade internasionál". Nia fó hanesan ezemplu sira maka Prezidénsia *pro tempore* Komunitade País sira Lian Portugeza nian, hodi dinamiza tan progresu iha nasaun frajil sira liuhusi g7 + grupu, no iha promosaun pás no konstrusaun Estadu iha Giné-Bisau, Saun Tomé no Prínsipe no Repúblika Sentru-Afrikana.

Bainhira ko'alia kona-ba progresu nasional, Primeiru-Ministru fó hanoin katak, "dalan ne'ebé mak timoroan sira atu liu ne'e sei naruk no difisil", maibé nia mós hatudu kontinuidade pás no estabilidade, konsolidasaun ba instituisaun sira no tranzisaun governu nian ne'ebé foin lalais ne'e la'o ho hakmatek hanesan elementu pozitivu husi dezvoltamentu. Nia rekonse mós katak sei iha serbisu ne'ebé atu halo ba afirmasaun soberania nasional liuhusi delimitasaun fronteira marítima. "Prinsípiu Timor-Leste nian maka luta liuhusi dalan negosiasaun tuir direitu no lei internasionál sira, no karik iha diálogu mak la iha konkordánsia, sei opta ba utilizasaun mekanizmu internasionál sira hodi fó solusaun ba hanoin sira ne'ebé la hanesan," Xefe Ezekutivu nian esplika

Iha parte ikus liu, Primeiru-Ministru ko'alia kona-ba tulun Timor-Leste nian ba Ajenda Dezvoltamentu Sustentavel 2030 hodi subliña katak "Timor-Leste sente satisfeito partikularmente ho inkluziun objetivu 16, ne'ebé reforsa elementu esensial pás, justisa, no instituisaun sira nian". Rui Maria de Araújo agradese mós ba Estadu membru hotu-hotu ne'ebé mak tulun ona Timor-Leste" iha ami-nia luta ba libertasaun nasional



Agio Pereira

+670 7723 0011

[agio.pereira@cdm.gov.tl](mailto:agio.pereira@cdm.gov.tl)

[govtlmedia@gmail.com](mailto:govtlmedia@gmail.com)

[www.timor-leste.gov.tl](http://www.timor-leste.gov.tl)

to'o ami hetan rekoñesimentu nu'udar Estadu soberanu".

Diskursu Primeiru-Ministru nian simu ho entuziazmu husi partisipante sira iha Salaun Assembleia Jerál no nia remata ajenda naruk ida iha Nova lorke, ho forma pozitiva no produtiva ba Timor-Leste.

Primeiru-Ministru no delegasaun ida ne'ebé ki'ik liu, sai husi Nova lorke iha loron 2 fulan-outubru, hodi halo vizita ofisiál ida ba Kuba to'o loron 8 fulan-outubru.

